

益公題跋二





跋題公益

(二)

撰大必周

王雲五主編
叢書集成初編

益公題跋
二冊

中華民國二十五年十二月初版

撰者 周 必 大

發行人 王 雲 五
上海河南路

印刷所 商 務 印 書 館
上海河南路

發行所 商 務 印 書 館
上海及各埠

益公題跋卷之七

家藏御書

紹興淳熙兩朝內禪詔跋

淳熙十四年臣某誤尸宰事恭奉至尊壽聖皇帝手詔命今上皇帝參決庶務越明年正月開議事堂傳授之意昭然會故相陳康伯家繳進紹興內禪御札默契聖志密遣中使持以賜臣自是開遜位之訓又明年春歲奉親筆移御重華於是兩朝宸翰東宮謝章皆萃私室後四年臣假守長沙漕臣何異願得摹本刻石盱江之麻姑山俾臣記大略于下臣竊惟孔子大聖人也抱帝王之學而無其時定書百篇以堯舜二典爲之首意猶未足嘗以堯曰咨爾躬舜亦以命禹之數語者諷道之于口諸弟子因記善言遂以爲論語末章之冠凡二十篇所載惟精惟一允執厥中之旨無大于此者向使夫子遭堯舜之時居禹臯之位奮膺熙載自

應見諸行事豈特載之空言而已臣獨何人寅緣宰輔乃萬世一遇非大幸歟夫奉奎畫于寶儲雖學士大夫有不容見闕宸文於金匱職在太史乃得窺焉至於藏之人臣之家不過榮光溢河實氣騰池孰若傳之副墨刻諸名山如日麗天萬目咸覩如岳鎮地永世無窮彼周石鼓秦嶂山漢燕然唐潛溪尚何足尊他日聖人復起比宋德于唐虞配斯文于二典其由此也夫先是高宗以壬午五月甲子降旨立儲丞相康伯折簡禮部侍郎呂廣問密議典禮時土王祀黃帝廣問爲初獻官臣以監察御史因語臣皇太子改名從火從華臣謂唐昭宗曄字同音可乎廣問亟告丞相取旨別擬定乃用今名宣布而初札不復改矣當時朝士尚不及知況于後世疑以傳疑將何所取正敢併列之背他日史臣採亦以見臣今得寶藏是書者非偶然也紹興四年十一月朔旦少保觀文殿大學士

判潭州軍兼管內勸農營田使馬步軍都總管益國公食邑一萬六百戶食實封三千八百戶臣周某謹題

高宗皇帝

紹興乙丑御筆跋

右紹興十五年四月宰臣以下拜表乞御殿復膳太上皇帝御筆付學士院淳熙五年四月臣偶因入直繙故書而得之敬命工標飾寶藏于家學士臣某謹記

御筆千字文跋

臣以紹興丁丑中詞科今上皇帝在普安邸數對宮寮稱其試程逮庚辰九月召試館職太上皇帝喜所對策諭宰相陳康伯參政朱倬欲除授書郎宰執奏選人只當爲正字偶不記前朝李邕等例耳上又宣諭他日當令掌制康伯覲爲臣言如此未幾自依格改秩而授書丞郎著作關員進擬皆

不及口口雖簡記然非侍從臺諫未嘗親批壬午夏察官陳良祐引執政汪澈荐舉之嫌出臺爲郎五月御筆監察御史尋闕諫官同僚爲臣必選臣測聖意不在此果就下用袁字爲正言今上受禪累月遂擢左史兼外制此則兩宮本指也後十七年叨貳大政表謝太上云鑒坡召試金口褒揚許以能文欲其掌制之援助廟堂之上甘滯留館閣之中會臺寮之虛員簡宸衷而親擢皆記實也暨入謝德壽宮太上盡已本末面賜御書千文一軸前者執政罕嘗得此退而伏讀太上御製翰墨志云智永禪師逸少七代孫克嗣家法居永興寺閣三十年臨逸少真草千文擇八百本散在浙東後并裱帖傳弟子辨才唐太宗三召恩錫甚厚求襖帖終不與善保家傳抑可重也余得其千文藏之今觀宸奎所臨疑皆是本淵民旦之外又缺才字按米芾云吳郡滕元發家藏辨才弟子所書併闕

永字以尊智永茲拜賜書却有永而無才字豈非
辨才門人別本歟謹刻於石歷敘遭遇之由以示
後世淳熙七年七月日通議大夫參知政事榮陽
郡臣周某恭題

御書禮記經解石刻跋

右御書經解一卷紹興三十年三月詔摹本賜新
進士梁克家以下臨安守臣端禮因以別本分遺
百執事臣某時爲大學錄謹受而藏之

孝宗皇帝

撰國書御筆跋

乾道六年冬詔差趙雄趙伯驢充金國賀生辰使
十二月二十四日夜直玉堂內侍霍汝弼持御筆
來令例外撰國書二鼓進于二十七日得旨來早
對二十八日早自東華門行修廟曲過小閣兩重
皆垂西簾復轉一小閣前臨清池中有假山上坐
杌子再拜起居訖褒獎諭前日朕未曾宣諭卿以

國書之意而卿能道朕心中事可謂大才袖出范
成大所攜虜主回書云九月日叔大金皇帝致書
于姪宋皇帝和約再成界河山而如舊緘音遽至
指筆洛以爲言授曩時無用之文讀今日既盟之
好旣云廢祀欲伸追遠之懷止可奉還卽俟刻期
之報至若未歸之旅柩亦當並發于行塗抑聞附
請之辭欲變授書之禮出于率意要以必從于尊
卑之分何如顧信誓之堅安在事當審處邦可乎
休方界霜嚴善綏福履今因資政殿大學士范成
大等回專附書奉答不宜捧讀數遍奏云臣初不
知彼專說陵寢刻期俟報今止及受書竊恐未安
上曰難爲辭奏云以太上高年未敢奉還答之如
何上不以爲然又奏容臣別作意度來日封進退
詣都堂上已批降前藁付二府矣於是改書曰比
致祈懇旋動誨緘欲重遣於輅車恐復煩於舍館
惟列聖久安之陵寢旣難一旦而輒還則靖康未

返之衣冠詎敢先期而猶請載彼諄諭之旨詳及授書之儀蓋今叔姪之情親與督尊卑之體異數因慶禮祥布忱詞尚冀允從式待企望今賀生辰國信使副翰林學士趙雄泉州觀察使趙伯驥行謹再奉書不宜二十九日錄進三十日宿衛加上德壽宮尊號冊寶于麗正門待漏院宰執在皇城司招往諭旨令削去陵寢衣冠一聯雖具言其不可弗聽也七年正月十二日雄等出門十七日丞相忽召至都堂云虜果移文問二事何爲無報甚悔不用前說答云幸彼問差早度尚可及亟亟易書馳遣而檄對竟云所問已有書附賀生辰使者矣仍錄本付雄毋如慶曆中不使爲弼知書意也二府特以爲然奏行之追及雄于盱眙虜自此亦無辭祕書少監兼權直學士院臣周某謹記

皇太子領臨安尹御筆并御批詔草跋

乾道七年四月甲子詔皇太子兼判臨安府用至

道故事也或謂當以大中大夫爲判官通領府事恐名稱未正遂議改尹而以侍從爲少尹餘判推官用卿監郎官丁卯將鎖院降麻或又疑宜麻給告非待儲貳之禮已已後省官會議於史院檢照唐太宗征遼命太子監國及大帝命太子受諸司啓事或詔或制與尋常白麻不同可以爲則上然之庚午臣當日被宣中書舍人范成大先以侍講遭宿蒼黃而出薄暮至玉堂御藥李某持御筆皇太子某宜領臨安尹總二十字有御押焉三鼓進草又擬格式一通御批竝依辛未遂告大廷推此盛典號爲稀濶而臣適以史官備討論詞臣參潤色復得宸翰寶藏于家非儒生之榮遇乎祕書少監兼權直學士院兼國史院編修官實錄院檢討官臣周某謹記

王炎除樞密使御筆跋

乾道七年七月二十六日國忌假薄暮快行忽宣

鎮院既至御藥甘澤齋御札來除王炎爲樞密使
依舊宣撫又出方寸紙載選將帥足財用及招軍
買馬等事傳旨云晚不及召對令論裒用炎之意
澤退更匆匆擬熟狀進入徐念向來未有中大夫
爲樞密使者別具奏乞轉大中奉御批依不然遂
失故事矣初炎與宰相虞允文不相能屢乞罷歸
允文荐權吏部侍郎王之奇爲大議除大制充四
川制置使允文欲進雜學士上疑太超躡此月十
三日乃先正除之奇侍郎上猶難之當令學士院
取侍從入蜀例俱無以對暨宣炎制宰相以下皆
莫測云新除權尚書禮部侍郎兼權直學士院兼
同修國史兼實錄院同修撰臣周某謹記

改左右丞相御筆并御批詔草錄跋

乾道七年十二月辛酉有旨以僕射之名不正欲
採周漢舊制改左右丞相令有司討論臣適備數
史院與聞其議右揆虞允文深不以爲然嘗語客

云既易履爲靴又改相名與虜奚辨有司知其意
亦頗遲遲但條具歷代宰相官稱申尚書省八年
正月己卯上忽遣中使王某至臣私第傳旨問綏
故回奏云昨日上之矣允文始以進呈二月癸卯
御筆令草詔登時封入迫遽殊不工尋奉御批依
卽寫大本請寶乙巳御前誤用答臣僚辭免不允
詔例復付學士院丞具奏繳進乞降付中書門下
省後五日遂鎖院拜二相詳見拜相御筆跋上初畱乾道
新書未頒欲候改丞相修入雜壓允文難之聞上
嘗遣人諭以毋沮遏此事蓋自左揆陳俊卿去國
允文獨相久之言恢復寢不驗且以專政稍失衆
心或謂上欲進梁克家故爲是舉云新除權尚書
禮部侍郎兼權直學士院兼同修國史兼實錄院
同修撰臣周某謹記

虞允文梁克家拜相御筆跋

乾道八年二月庚戌從駕過德壽宮既歸得旨申

時赴東華門祗候宣引至則聞有內宴武云恐改日言不敢退酉後忽引入選德殿起居畢上出親札一幅諭以拜二相奏云命相轉官前例固不一今竝命而或三或四更取聖製上曰大臣同心輔政革苟且之弊故褒進之然特進一官卽少保所以允文只三官又請戒訓大指上再三曰褒之而已前設小案伸紙其上歷以牙尺漆匣盛小款研玉格真筆兩枝墨一笏幾便坐所御者遂鞠躬除目進呈奏問兼樞密使否上曰今樞密亦非古先改丞相稱呼將來別理會且帶可也又奏所領書局上曰卿自契勘又及左右相序位上曰欲升左三少之上三公之下賜坐奏同賀正使回房中無他否上曰無事但聞築黃河堤耳速聞請起宣坐賜茶飲訖再拜而退御藥李彥直同自複道入學士院已秉燭矣舊例草后妃宰相制皆有錫賚紹興以來就賜御前所用金硯匣筆格鎮紙糊簡黏

版等後既不設此乃謂打造不及金百兩代之殆減半也凡鑲院若中書進熟則隨事云鎖某日欲晴快行數十輩絡繹宜當直官遇大除拜臨時特旨宣召上帽帶御別殿面諭之俗呼鎖小殿子今日上特祕其事不用宣鎖之制院吏授夜關閣門移御史臺報百官聽麻雖虞允文亦謂用新制改官名爾明日雙制出始大駭且疑學士多轉梁克家一官爲有所抑揚云權尚書禮部侍郎兼權直學士院兼侍講兼同修國史兼實錄院修撰臣周某謹記

幸學詔御筆跋

淳熙四年二月辛未奉御筆如右前一聯大哉王言也後八字毋固毋我也試尚書吏部侍郎兼直學士院臣周某謹記

御書白居易詩跋

右唐白居易太和八年以太子賓客分司東都賦

飽食閒坐詩一首淳熙五年皇帝親御翰墨下臣拜受而寶藏之謹按居易先以長慶二年過漢江賦詩云秋水浙紅稻朝烟烹白鱗今復云紅粒陸渾稻白鱗伊水魴蓋於一飲食間默寓忠愛不忘君之意所謂造次必於是者時文宗雖恭儉儒雅而中人之禍已萌其云朝廷重經術草澤搜賢良殆譏不能用劉蕡也又云堯舜求理切夔龍啓沃怵言上雖銳意于治而王涯口口爲相非徒無益也又云懷才抱智者無不走遑遑指李訓鄭注等也明年而甘露之亂果作居易其知幾乎生雖不逢其時孰知三百餘年之後乃一遇聖明發揮其語光榮多矣臣叨陪近侍獲此宸奎敬題卷末以示來裔翰林學士臣周某某記

後七年當淳熙乙巳歲四月戊辰臣某稽首重觀于西府

御書蘇軾和唐人惠山泉詩跋

右蘇軾元豐二年自徐州移守湖州道由惠山和唐人三詩皇帝書其首篇臣某敬寶藏之淳熙七年四月一日吏部尚書兼翰林院學士承旨兼侍讀兼太子詹事兼修國史臣周某某記

御筆掌記跋

上勤勞萬機每臨朝以方寸紙作掌記微偃兩旁而中摺之實在御手若內殿則閣香案上三省密院各奏事畢卽視所記俟宣諭已乃收之率以爲常淳熙十一年八月十七日後殿坐親以此紙授臣蓋記陳有功詹大舉趙善誦三人姓名字畫頗類御筆以小楷不能深辨玉音云此是去年臣僚荐可爲奉使接送伴副使者卿選擇誰可又問劉端姜特立如何臣奏皆其選也退而寶藏于家樞密使臣某謹記

光宗皇帝

東宮秋雨詩跋

淳熙四年八月四日東宮講畢袖出御製秋雨過書懷詩一篇六日又蒙送示和章詞翰雙美光照蔀屋垂索製句輒附于後某恭題

御批辭免兵部侍郎不允奏跋

右辭免兵部侍郎奏其云灼見肺腑蓋聖語也御批降詔不允翰林學士王淮撰文正本藏篋中別令書待詔鄭漢卿錄于後寫奏者待詔雖榮祖淳熙二年閏九月臣某謹記

內批辭免侍講不允奏跋

淳熙二年

右手書辭免兼侍講奏內批降詔不允擢中書舍人程大昌視草既以真本藏制書篋中復令學士院待詔鄭漢卿錄本于此閏九月十五日臣某謹記

御批辭免兼太子詹事降詔不允奏跋

淳熙二年秋太子詹事沈樞罷王淮尋入西府衆謂吏部侍郎趙粹舊爲宮僚兼權中書舍人程大

昌乃恭邸講讀官宜在此選而臣猥以小司馬蒙恩承乏亟具奏控免其云英望舊僚實指二人上親批降詔不允四字時翰林無他官例下西掖視草於是大昌用綺里事對李勣蓋相酬答也元詔寶藏篋中特令待詔鄭漢卿錄本附辭免之後其奏亦院吏闕端朝所書敬加標書傳示子孫十一月旦臣某謹記

內批辭免經修太上帝曆轉官不允奏跋

右辭免經修太上帝曆轉官奏內批降詔不允詔權直學士院程叔達撰既藏正本復令待詔錢滋別錄於此寫奏者筆吏吳牧也三月二十七日臣某記

御批辭免內翰不允并詔書跋

淳熙四年

右辭免內翰奏上親批降詔不允詔書程叔達撰文并以謝宣詔表藥附其後六月既望臣周某某謹記

御批巧祠不允奏并詔書跋

淳熙五年五月請對巧外上恩不允閏六月繼請又不允會諫議大夫謝廓然乞令朝士久次者聽更迭補外於是吏部尚書韓元吉侍郎李椿相繼得請或謂臣污朝最久廓然未必不相及既袖札子面奏即蒙宣諭云無人譖卿元吉以老李椿以病乃許其去卿何預此況諫疏亦非謂侍從也卿奏便批降詔不允毋得再請其餘獎勞之語不復具載敬以御筆及中書舍人王希呂所草詔書軸藏于家九月三日臣某謹記

內批辭免幸祕書省轉官不允奏并詔書跋
右淳熙五年九月同史院官程大昌等四人辭免車駕幸祕書省轉官奏內批詔不允陳騤芮輝官品未至直批不允而已時翰苑無他官例付中書後省於是權舍人鄭丙實視詔草臣既寶藏而軸之命院吏錄批語諮報三省割下臣騤并臣輝俾

有所被受蓋一時綿蕤也十月旦日臣某謹記

內批辭免春官翰苑不允奏并詔書跋

淳熙五年

右辭免春卿兼翰苑奏內批降詔不允院官崔敦詩視草十二月六日臣某記

御批巧祠不允奏并詔書跋

淳熙五年冬臣爲學士一年有牛矣數求去未遂曾觀韓彥古輩間言曰間因答北虜賀會慶節國書曲意指撻適殿帥王友直提軍大擾密疏其事遠近滋不悅孤蹤益危急援揚億鄰壤事引咎巧祠而上恩過厚保全甚力御筆塗去說改國書等六十餘字親批降詔不允不得再有陳請他侍從始無此禮以是不敢復言旋被獎擢進位宗伯視草如故蓋異數也今以宸翰同崔敦詩所撰詔書共爲一軸而藏曲折于後十二月七日臣某謹記

內批辭免經修乾道日曆轉官不允奏跋
右辭免經修聖上日曆轉一官不允詔權直院崔

敦詩撰待詔王世賢爲其奏乃筆吏曹大亨書淳熙六年四月五日臣某謹記

內批辭免東宮講禮記徹章轉官奏跋

淳熙六年

右辭免東宮講禮記徹章奏內批降詔不允今以權直院崔敦詩所作詔草附其後使子孫識玉堂詞頭之一其爲奏乃筆吏俞允迪也六月一日臣某記

內批辭免吏部尚書兼學士承旨兩奏跋

右淳熙六年冬辭免吏部尚書者一辭免兼學士承旨者再兩奉御批降詔不允其詔并崔敦詩草各附真草於後上批第三奏云依已降詔不允不得再有陳請徑付三省亦錄堂帖於此明年二月手奏乞依舊分日內直上親批十一字今共爲一軸寶藏之三月旦臣某謹記

御批丐祠不允兩奏并詔書跋

淳熙六年九月宗祀禮成卽請對丐祠上頗露大

用之意親批降詔不允四字

詔中書舍人鄭丙撰待詔羅榮祖爲中

外不相說者故漏密指而誦言之是冬遂徙吏部

尚書明年夏擢參大政權要近習絕無知者蓋上

察其奸也第二奏又有御批十二字乃取諸省中

附卷末七年六月一日臣某謹記

御筆辭免吏書兼承旨兩奏跋

淳熙五年五月四日對清華閣丐外上曰內翰未

可去方將擢用宐荐卿監郎官能文者相代且令

撰選德殿記至閏六月記成十四日進呈於倚桂

殿上再三稱善遂出求去劄子上曰屢令卿荐一

兩人能文者此亦何嫌尋御批降詔不允

詔中書舍人陳

騷撰待制王世賢寫是月末偶吐痢交作又微聞言官謝廓

然相忌七月一日復入奏申前請上又親批十二

字付外後二年入中書得以案底附卷尾非特寶

藏宸奎亦使子孫知恩遇優渥如此相勉圖報云

七年六月十日臣某謹記

御批丐祠不允兩奏跋

淳熙七年四月臣以病求去上親批降詔不允視
草者學士院官趙彥中也既拜賜復具奏申前請
上又批依已降詔不允不得再有陳請奏下三省
中書批旨滕本丞相趙雄參知政事錢良臣押字
千歲月之下用中書省印舍人鄭丙押其背錄以
黃紙用門下省印謂之錄黃宰執給舍皆簽名然
後送尚書省出劄子其次序如此後一月臣蒙被
恩擢參豫政機既取原奏于翰苑附以詔書又進
第二奏及底本于中書聯爲一軸非特寶藏宸奎
亦使子孫識省中文移之大略云六月二十有五
日臣某謹記

淳熙癸卯生日御筆跋

右淳熙癸卯受生日牲饌文書一軸首以宸翰而
詔書次之趙彥中草賜目又大之用錫賜之寶併錄謝表于
後例以生日
五更投進先是夏旱七月十一日侍講李燾進

故事乞避殿損膳求直言十二月上諭三省令降
旨如故事丞相奏恐合降詔臣等亦欲待罪郊外
上令召學士院官趙彥中草詔仍許侍從等實封
言事十三日四鼓宰執分詣天地社稷宮觀禱雨
禮畢赴後殿起居從駕過德壽宮回竝出浙江亭
有頃中使宣押歸第次日歇泊不坐例入局治事
私念於理未安約丞相再奏乞罷黜而賤生之日
適在既望當賜牲饌方此引愆亦難下拜乃別入
奏控免仍報天章閣勿排辦十四日中使復宣押
入堂具御批十六字于免奏之後於是天章閣奏
審依式前一日賜今已日晚上下令就來早十五日
辰時內侍鄭懷持詔來蓋新儀也既拜賜于階下
與懷同升廳撥笏拱讀詔書及賜目訖就坐茶湯
如常送懷錢十五千從人三千版旨
乃受本閣使臣庫
子快行各支錢酒有差翰苑舊例抄生日詔止畫
進呈之日往往與文不相應昨日蒙恩直院卽奏

云雖前期進草其畫日欲隨生日後肯從之遂爲
定例因詳載於此臣某謹記

益公題跋卷之八

家藏法帖書畫碑刻

題後省封事看詳

紹興壬午秋上新卽位詔求直言四方封事沓至
或畱中或付後省看詳時中書舍人劉珙出使某
與給事中金安節舍人唐文若晝夜分閱次第上
三省而省吏以逐房事有所主互相避免不卽以
聞九月有温州潘生投匭言前所上書有司不爲
施行御筆督責甚峻是月十八日也翌日某約安
節文若攜此藁就漏舍白執政欲少追蔽抑之罪
執政遂袖至榻前某是日立左螭望見御手開閱
數四天顏甚悅退朝赴講筵安節畱身頓首謝上
曰早來執政已詳言非卿等過也後三年歲在乙
酉繕故書見此敬題其後而不敢毀所以尊御覽
也五月一日

潘生恐
名天覺

益公題跋卷之七

終

題夜光集

予以丁丑拜命分教金陵庚辰春入官學省凡三年間書啓往復與夫士友相遺者皆聚此編示不敢忽也

題秦少游瑤池宴

少游所書瑤池宴蘇易簡也事在冷齋夜話湘山野錄止有數句恐與此不同 乾道辛卯九月十七日周某子充題

後四年令工鄭源重裝時再掌內制故用翰苑

印識之

淳熙跋詛楚文

右詛楚文待制董公守汾日辨證刻石先公時爲州學教授實爲書丹後四十年得副墨于董公之子余今十年矣此文六一先生集古錄趙氏金石錄方相泊宅編皆爲之說而嚴陵延平各有別本今特以爲先公手澤在焉故重刻之蓋爲家塾之寶也淳熙元年甲午七月十九日嗣子某題

家塾所刻六一先生墨蹟題跋十首

試筆

世傳文忠公試筆自說研而下凡數十紙有元祐四年九月東坡蘇公跋此最後數紙也初入劉氏後歸王晉卿今復還歐陽氏餘不知何之矣公是于熙寧五年距元豐五年其遺墨已爲諸公珍愛如此況百世之下乎淳熙甲午十月廿八日某書

唐贊草

右藏郡人會昌尉羅良弼家良弼字長卿博雅士也

錄徐嶠書

右藏郡人安遠令曾耑家試察之下尚有孟秉二字餘皆漫滅不知何人帖也

會食帖

右爲帖不竟豈筆誤別書抑意倦遂止也

誨學帖

右因友人胡公武而得之世有歐陽忠公別集二

十卷自志學至夢奠詩書惟說之類文集所略者舉集焉而亦不及此乃知遺書散軼多矣惜哉

小草古詩賦

右藏思仲之子將作監丞當世所或脫字弗補或衍字弗塗或意未愜重書悉仍其舊

臨小草洛神賦

右臨率更所書洛神僅存其半某實保藏之王子敬好寫此賦決非一本殆率更臨本耶比近世所刊字畫差瘦小云

家藏小草洛神賦 不魯入石

錢穆父謂王子敬草洛神賦在范堯夫王晉卿苑中濟三家元祐末合而摹藏之遂以入石今歐陽文忠公所臨四百八十五字題云歐陽詢書或乃以穆父所聚卽率更筆未知孰是予不識書特以人之賢而寶藏之耳按歐陽家譜文忠蓋率更三十代孫是固一家也紙背乃晏元獻行狀當時求

銘于公者淳熙二年十月一日東里周某記

家書

右與伯和家書蓋熙寧四年守蔡時也後兩月而公歸矣今藏元孫儒林郎雋所

前漢玉器銘

六一堂集古錄千卷卷爲一遞縹以緗紙束以縹帶揭秩次于外列名物于首而係考證於後銜幅皆用名印其精謹如此靖康間公諸孫避難南行不能盡載乃取遺澤而棄舊刻此五銘者總爲一軸晉尾獨備人皆云前漢昭宣時字畫跋誤以始元爲宣帝今併刻之不特使後世識其全篇體製抑亦成公遺志也歟五鳳黃龍三器字極小而銘雖大而瘦勁刻銅旣不能深藏久印染復點昧熟視之前銘容十之下但晦斗字與後銘同亦彷彿可辨蓋不必均以四字爲行也